

20 AUG 2003

I

DIALOG BELIA ASIA DIJADUAL BERLANGSUNG 29-31 OGOS INI

PUTRAJAYA, 20 Ogos (Bernama) -- Kira-kira 200 belia tempatan dan luar negara dijadualkan untuk mengambil bahagian dalam majlis Dialog Belia Asia 2003 (AYD) yang julung-julung kalinya diadakan di Kuala Lumpur selama dua hari mulai 29 Ogos ini.

Timbalan Menteri Dalam Negeri, Datuk Chor Chee Heung hari ini berkata dialog yang bertemakan "Asian Youth Towards Borderless Cooperation" itu bertujuan mengiktiraf dan mengesahkan inisiatif berterusan kerajaan untuk memupuk semangat pemimpin belia yang berwawasan dan berkaliber.

Antara lain, dialog itu bertujuan meningkatkan jaringan kerjasama peringkat serantau dan antarabangsa di kalangan belia disamping mengeratkan hubungan antara pertubuhan belia negara dengan pertubuhan belia di rantau ini," katanya dalam sidang berita di sini hari ini.

Ia juga bertujuan menyediakan satu landasan yang kukuh kepada pemimpin belia di rantau ini untuk membincangkan isu-isu kritikal yang akan memberi kesan kepada para belia dalam bidang sosial dan ekonomi.

Menurutnya para peserta akan turut dibawa melawat Melaka dan mengunjungi Ketua Menteri Melaka, Datuk Seri Ali Rustam, yang juga adalah Presiden Perhimpunan Belia Sedunia.

Dialog anjuran bersama Kementerian Belia dan Sukan serta Majlis Belia Malaysia itu dijangka akan dirasmikan oleh Perdana Menteri, Datuk Seri Dr Mahathir Mohamad.

-- BERNAMA

RIZ AZH